

古今事物考



古今事物考卷三

整屋王三聘輯

國制

國號 班固典引曰肇命人主五德初始厥有氏號莫不
開元于太昊注謂太昊號庖犧炎帝號神農黃帝號軒
轅蓋自燧皇而上止以自名未爲天下之號也至太昊
始以庖犧爲代號云

年號 始自漢武帝建元元年按趙弼考紀元云以一字
紀元者始于漢文帝後元年景帝中元年以二字紀元
者始于武帝建元元年以三字紀元者始于梁武帝大

中通元年以四字紀元者始于漢哀帝太初元將元年
今詳立號以紀元當始文景非武帝也

改元 史記曰秦惠文王十四年更爲元年自漢唐至宋
元皆踵其失蓋歷代人君卽位爲元年中間無改元之
制惟國朝獨能正之

五運 通曆曰太昊木德王始有甲曆五運炙轂子曰五
運有二說鄒衍以相勝劉向以相生自伏犧至顓頊木
火土金水相承漢魏以還共遵劉說伏犧木德神農火
德黃帝土德少昊金德顓頊水德帝嚳木德帝堯火德
帝舜土德夏金德商水德周木德秦水德漢火德魏土

德晉金德隋火德唐土德宋火德

色尙 歷代帝王爲正各異故所尙不同刑昺論語疏自
夏正尙黑推而上之謂伏羲以上未聞謂女媧尙白神
農赤黃帝黑少昊白高陽赤高辛黑陶唐白有虞赤宜
自太昊始也

尊號 項峻始學篇曰天地立有天皇號曰天靈卽帝王
尊號之始也秦有天下李斯請上尊號曰泰皇至唐高
宗始稱天皇中宗曰應天皇帝玄宗開元以後宰相始
率百官上尊號以爲常制宋神宗以虛名無實遂罷之
也

聖節 明皇雜錄曰唐玄宗八月五日降誕是日宴宰相於花萼樓源乾曜請以是日爲千秋節羣臣獻萬歲壽酒其後天子誕日節號自茲始也穆宗誕日令天下州府置宴文宗誕日始禁屠宰宋循用國朝萬壽聖節百官朝賀致詞

視朝 漢書曰宣帝五日一聽事通典曰唐貞觀十三年房喬奏三日一臨朝長孫無忌奏視朝坐日高祖報曰每日常坐後詔五日升太極殿視事朔望卽爲常式宋五日一視朝謂之起居國朝常日早朝御奉天門午朝御左順門朔望禮節升殿

索扇 唐明皇時蕭嵩爲相奏請天子升降俯仰衆人皆得見之非肅穆之容也凡朔望受朝備羽扇於殿上將出所司承旨索扇扇合止坐坐定去扇禮畢上將退又索扇如初

聖旨 格古要論曰秦漢天子稱制詔勅中宮東宮諸侯王稱令郡守稱敎無名爲旨者魏晉天子稱聖旨若曰奉承聖上之旨意而已然則稱旨行事本取指撝之義以從尋常簡便之稱

傳旨 天順日錄云自太祖相傳列聖臨朝每至日昃不遑暇食英宗以幼冲卽位三閣老楊榮等慮聖體易倦

因創權制每日早朝止許言事八件前一日先以副詣閣下豫以閣事處分陳上遇奏止依所陳傳旨而已迄今遂爲定制

票旨 國朝英宗九歲登極有詔凡白於張太后然後行太后令付內閣議決具帖開報內閣票旨始此

朝后 百官命婦入朝皇后自唐武后始也

警蹕 周禮夏官隸僕掌蹕宮中之事注謂止行者自漢以來天子出稱警入稱蹕注謂奉制出軍者皆警戒入國者皆蹕止一曰蹕路也謂行者皆警於塗路也蓋始於周制

微行 帝王微行自漢武帝始也劉氏曰盧生教始皇爲微行非自漢武帝矣

經筵 國朝景泰初始開經筵是時每講畢命中官布金錢於地令講官拾之以爲恩典天順八年甲申八月二日憲宗登極御經筵歲率以二八月中旬起四十月末旬止月三會講日皆逢二

大赦 秦二世卽位大赦丘氏曰此後世人君初卽位肆赦之始也

大宴 漢高帝十月長樂宮成置酒宴羣臣此錫宴之始也宋朝南郊畢大宴廣德殿曰飲福宴聖節後大宴曰

次宴國朝凡大祀天地次日慶成大宴凡正旦冬至聖節洪武永樂間大宴并如慶成儀宣德以後朝官不與宴者給賜節錢鈔錠

常宴 宋眞宗朝聖節外始備設春秋二宴以爲定制國朝凡立春元宵四月八端午重陽臘八等節永樂間賜百官宴於奉天門東宮千秋節宴於文華殿宣德以後與皇太后壽旦俱出宴於午門外

避殿 史記曰七國反吳王旣敗走景帝詔曰楚王卬等重逆無道燒宗廟朕素服避正殿則其事始自漢景帝也孝宣之世亦行其禮秦漢已上未聞

損膳 周禮膳夫掌王食羞王日一舉鼎十有二物皆有
俎齊日三舉大喪大荒大扎天地有裁邦有大故皆不
舉是王不舉者損常膳也蓋自周公制禮之始故漢文
帝微服損膳迄今國有災減日食避正殿行之爲始
輟朝 唐會要曰開元十八年十一月張說薨輟朝罷元
會是自明皇始也太和中崔龜從奏云正觀中任瓌卒
有司對仗奏聞太宗責其乖禮推是則太宗以來尙未
行茲禮也

廊飡 唐會要曰正觀四年詔所司於外廊置食一頓五
代會要曰唐升平日常參官每日朝退賜食謂之廊飡

宋起居幕中賜酒饌

賞賜 書曰車服以庸自唐虞卽然商功懋懋賞周有車馬器服之等大明會典曰皇帝登極冊立東宮巡狩親征視學經筵纂修實錄大臣公差考滿患疾致任京官省親節令王府三司慶賀諸番四夷朝貢軍功賞賜用鈔錠胡椒蘇木銅錢并銀兩衣服鞍馬冠帶羊酒扇條時鮮米蔬等物各有差等

復鄉 漢高祖破英布還過沛復其民後世創業之君復其故鄉自漢高祖始也

賜爵 漢惠帝卽位始賜民爵戶一級自後凡初改元率

以爲例

優免 周禮卿大夫之職其舍者國中貴者賢者能者服公事者老有疾者皆舍漢之有復除猶周之有施舍皆除其賦役之謂也國朝有優免差役之例

蠲貸 文獻通考曰漢以來始有蠲貸之事蓋三代之取民田賦而已如下上上錯下中三錯之類未嘗立爲定法非如後世立爲定額雖升合不可逋欠也由唐以來取民愈重其法愈煩故蠲貸之令愈多

登聞鼓 昔堯置敢諫之鼓卽其始也用下達上而施於朝登聞東京記曰唐置匭興國九年改爲檢院曰登聞

養濟院 唐會要曰開元中京城乞兒官置坊給廩食爲
養病院又分置悲田院於諸寺宋因之以僧院名福田
國朝洪武初令天下置養濟院以處孤貧殘疾無依者
天順元年令收養貧民於順寺觀從京倉支米煮飯日
給二餐

官典

廕敍 書臯陶稱舜曰賞延於世則廕敍自有虞氏始也
漢二千石以上視事滿三歲得任同產若子一人爲郎
國初因前代任子之制文武一品至七品皆廕子一人
以世其祿成化三年奏准在京三品以上官聽令一人

送國子監讀書出身若大臣果有勲勞於國出自特恩錄用子孫者不在此限

鬻官

沿革曰鬻爵賣官三代無有起於秦漢之權利通典曰漢文帝納晁錯言令人入粟六百石爵上造萬二千石爲大庶長漢武帝國用空竭募人入奴婢終身以爲郎靈帝懸鴻都榜開賣官路

試職 書曰明試以功唐武后凡舉人無賢不肖咸加擢拜大置試官宋神宗改官制有行試守三等試未正命也階高官卑稱行階卑官高稱守國初凡在京初入仕者試職一年御史試職半年考堪實授

會推 國朝進退人臣皆出於宸斷成化間始有吏部會
官推舉之例其權遂歸於內閣

考滿 舜典曰三載考績三考黜陟幽明宋朝以考定勞
一歲爲考四考而遷國朝京官歷奉三年五品以下從
監察御史考覈吏部覆考各以九年通考四品以上任
滿黜陟取自上裁外官三年考滿給由到部亦以九年
通考

休沐 史記李園事春申君謁歸故失期則假告已見於
戰國漢律吏得五日一休沐言休息以洗沐也唐永徽
三年以天下無虞百司務簡每至旬假許不視事以寬

百僚休沐然則休沐始於漢其以旬休始於唐也國朝
正旦節放假五日冬至三日元宵十日

豁宿 宋朝館閣每夜輪一人直宿如有故不宿則虛其
夜謂之豁宿豁宿不得過五日卽須入宿若遇豁宿不
到於宿曆書腹肚不安相傳爲害肚曆

致仕 書曰伊尹旣復政厥辟告歸於王註謂告老致政
事於君此臣下致仕之初也自周乃有大夫七十致仕
之禮

策免 漢成帝策免大司馬許嘉此策免大臣之始

德政碑 陸龜蒙曰古者懸而窆用木書之以表其功德